



Sesida dals

29 d'avust 2017

Communitgà ils

31 d'avust 2017

Protocol nr.

746

### **Incumbensa Stiffler (Cuira)**

concernent la pratica dals departaments chantunals per surdar incaricas da prestaziuns da servetsch a terzs en cas da publicaziuns betg uffizialas

### **Resposta da la regenza**

La regenza è ordvart conscienta da la rolla dal chantun sco incumbensader impurtant, ed ella persequitescha attentamain quest fatg. Nua che quai è pussaivel e raschunai-vel tira l'administraziun chantunala perquai a niz en general gia oz la libertad d'agir tenor la legislaziun da submissiun a favur da l'economia indigena. Offertas vegnan dumandadas en cas singuls en moda fitg restrictiva tar firmas extrachantunalas, sche quai è necessari pervia da las pretensiuns specificas da l'incarica e pervia da las cum-petenzas particularas da l'offerent en il sectur spezial respectiv.

Tenor las statisticas da surdada da blers onns han offerents grischuns pudì vegnir resguardads fin ussa en il chantun Grischun en la pli gronda part dals cas per las acquisiziuns dals incumbensaders publics. Uschia èn 80,6 pertschient da tut las surdadas che ston vegnir annunziadas tenor la prescripziun da la lescha chantunala da submissiun (tut las incaricas da construcziun, furniziuns, prestaziuns da servetsch a partir da 50 000 francs) idas l'onn da gestiun 2015 a firmas indigenas. En las proceduras directas ed en las proceduras d'invit han 81,7 pertschient dals furniturs da prestaziuns da servetsch già l'onn 2015 lur sedia en il Grischun. Tar las surdadas da l'administraziun chantunala è questa valur stada cun 82,9 pertschient schizunt anc pli auta.

Las lavurs ch'eran vegnidas prendidas per mauns l'onn 2013 entaifer l'administraziun en consequenza da l'incumbensa acceptada Felix (Haldenstein) concernent l'impur-tanza da las acquisiziuns publicas per l'economia publica cun l'intent da sondar even-tualas ulteriuras libertads d'agir en la legislaziun da surdada, èn vegnidas sistidas ad interim en vista al fatg che la cumissiun da concorrenza (CUMCO) ha extendì las re-tschertgas sin l'entir territori chantunal sco er en vista a la revisiun parallela actuala da la legislaziun da surdada svizra. Questas lavurs duain pudair vegnir cuntinuadas l'onn proxim suenter ch'ils cuntegns correspundents èn enconuschents.

Tar las singulas dumondas:

1. En l'ambient politic actual reconuscha la regenza il basegn da trasparenza supplementara en il sector da las acquisiziuns. Complementarmain a la statistica da surdadas prescritta da la lescha è ella perquai pronta da rapportar davart las incaricas da prestaziuns da servetsch ch'ils departaments ed uffizis chantunals han surdà ils onns 2014–2016 en la procedura directa ed en la procedura d'invit. En enclegientscha cun las emprimas duas personas che han sutsegnà l'incumbensa èsi – per cunfinar ils custs administrativs – vegnì fixà che las cudeschaziuns en la contabilitad da las finanzas duain servir sco basa da datas. Summas pli pitschnas na duain pia betg vegnir resguardadas.

2. En il rapport ch'è d'elavurar duai ultra da quai vegnir mussà, co ch'ina eventuala mancanza da know-how dals offerents indigens, cunzunt da manaschis pitschens e d'interpresas giuvnas, po vegnir cumpensada resp. sviluppada tar incaricas publicas, per che lur schanzas da survegnir incaricas dal maun public creschian.

3. Per la formulaziun da finamiras annualas dals uffizis vegn resguardada en l'avegnir explicitamain l'exauriziun da la libertad d'agir en cas da proceduras directas e da proceduras d'invit a favur da l'economia indigena. Ma a l'administraziun chantunala duai esser permess er vinavant d'incaricar offerents extrachantunals en cas da circumstanzas spezialas. Independentamain da quai vali d'examinar la pratica d'acquisiziun e da far eventualas correcturas necessarias per garantir il diever economic dals meds finansials publics, suenter che la procedura currenta da la CUMCO e la revisiun menziunada da la legislaziun da surdada svizra è terminadas.

4. Per augmentar la trasparenza duain las incaricas ch'èn vegnidas surdadas dals singuls uffizis e ch'èn relevantas per l'economia grischuna pudair vegnir consultadas facilmain en l'avegnir. Il departament da construcziun, traffic e selvicultura vegn a relaschar ina directiva correspondentia per quest intent.

5./6. Las incaricas da prestaziuns da servetsch ch'èn vegnidas surdadas da l'uffizi per economia e turissem dapi l'onn 2012 figureschan sin la glista separada che po vegnir consultada sut <https://www.gr.ch/DE/institutionen/verwaltung/dvs/awt/ueberuns/Seiten/Themen.aspx>. En quest connex stoi vegnir remartgà che quest uffizi ha – pervia da ses champ d'incumbensas, pervia da las dumondas savens surregionalas e pervia dal basegn cumprovà dad enconuschientschas specificas – plitost da basegn da consultar expertas ed experts extrachantunals.

Sut las restricziuns menziunadas è la regenza pronta d'acceptar questa incumbensa.



En num da la regenza

La presidenta:

B. Janom Steiner

Il chancelier:

Daniel Spadin